



Otmar Oduber di E Forsa Nobo.

POR TA KERE DEN UN REVOLUCION ECONOMICO KICO ESEY KIERNEN?

Luna pasa plataforma E Forsa Nobo POR a publica un articulo na unda cu lider di partido señor Otmar Oduber a elabora riba e importancia di inicia y stimula un revolucion economico. Esaki principalmente como herment pa cambia e rumbo economico di nos pais. Segun Otmar Oduber e revolucion economico mester cuminsa awo. Den e articulo menciona a duna informacion relaciona cu diferente tema di importancia. A trata temanan esencial, manera (1) costo halto di haci negoshi na Aruba, (2) necesidad di un base legal, (3) educacion di comunidad como tambe e (4) importancia di continuidad a base di un Plan di Accion Nacional.

E Forsa Nobo ta kere den duna comunidad informacion corecto, consistente y transparente. Como parti di transparencia y informa comunidad, Oduber lo ta enfocando tur siman riba e diferente temanan menciona. E siman aki lo trata e tema di Plan di Accion Nacional. Segun Otmar Oduber 'un vision sin envolvimiento di comunidad y sin plan concreto di accion y implementacion no lo ta un vision cu por realisa'

Dicon esaki ta importante?

E Forsa Nobo ta realisa cu ta mas facil pa pensa riba un plan y un vision cu pa ehecuta y implementa dicho plan y vision. Por duna varios ehempel di plannan innovativo cu ta wordo presenta cu hopi entusiasmo y animo y despues ta terminal den un archivo of ta wordo ehecuta den un forma no sostenibel y sumamente costoso. E Forsa Nobo kier distingui su mes di otro iniciativa dor di enfoca riba

un punto simpel y hopi biaha lubida; esta e plan di accion y plan di implementacion. Na un manera simpel bisa, 'con como partido lo bo percura pa berdaramente cumpli cu locual bo a priminti y lo uza bo recursonan den forma responsabel y eficiente'. Ora ta trata di inicia y stimula un revolucion economico, e promer paso ta pa diseña un plan di accion transparente y inclusivo.

Kico ta un plan di accion?

Un plan di accion ta un herment uza frecuentemente den sector priva y dor di companianan exitoso na unda cu un vision general (meta principal di un compania) ta wordo parti den accionnan concreto.

Asina e compania ta logra realisa su meta den e tempo stipula como tambe dentro di presupuesto disponibel. E plan di accion ta preveni perdemento di tempo como tambe malversion di fondo. Un punto esencial di un

plan di accion ta cu cada accion tin un persona of departamento responsabel pa e ehecutacion di esaki. Si acaso e ehecutacion no wordo realisa, mesora lo bira aparente ken no a haci su trabou den forma corecto y e motibo dicon no. E plan di accion ta brinda esnan cu ta uza e herment aki, e oportunidad pa ta autocritico y evalua y dirigi accionnan na tempo.

E accion (kico)	Persona responsabel (ken)	Tempo (ki ora)	recurso (cuanto)	Resultado desea (exito)

Dicon sector priva si y gobierno no? Un plan di Accion Nacional

Plataforma E forsa Nobo ta di opinion cu e plan di accion mester ta e herment primordial a base di kico un vision ta wordo ehecuta. Pa e motibo ey POR ta para pa implementacion di un plan di Accion Nacional na unda cu e vision pa inicia y stimula

un revolucion economico lo wordo delinea den accionnan concreto durante e periodo di gobernacion. E forsa nobo lo crea un portal (plataforma) digital na unda cu pueblo henter por subi y evalua e curso di gobernacion. Esaki no

na final di cuater aña sino durante di gobernacion. Esaki no a base di falta di transparencia pero a base di un maneho di buki habri. Ta asina so por duna e respet bek na esnan cu gobernantenan ta sirbi, esta e pueblo di Aruba.



Pa mas informacion tocante temanan presenta bishita:

- https://www.mindtools.com/pages/article/newHTE_04.htm
- <http://ctb.ku.edu/en/table-of-contents/structure/strategic-planning/develop-action-plans/main>